

## **CEO MAS Tolak Penyatuan MAS-AirAsia Untuk Masa Depan**

**MStar**

**11 Jun 2015**

**Oleh: NEVILLE SPYKERMAN**

**KUALA LUMPUR:** Ketua Eksekutif Malaysia Airlines (MAS) Christoph Mueller berkata beliau akan sekali lagi menentang sebarang percubaan untuk menyatukan syarikat penerbangan nasional itu dengan AirAsia.

"Saya dengan keras menentanginya," katanya semasa berucap pada Persidangan Asia Pembangunan Lapangan Terbang Global (GAD) 2015 pada Khamis.

MAS dan AirAsia cuba membuat pertukaran saham dalam usaha untuk bekerjasama dan mengurangkan persaingan pada tahun 2012 tetapi perjanjian itu telah dibatalkan kerana tekanan dari kesatuan pekerja MAS.

Walaupun meramalkan mungkin ada penyatuan dalam industri penerbangan serantau dalam tempoh lima tahun akan datang, Mueller berkata setiap negara perlu mempunyai sekurang-kurangnya dua syarikat penerbangan.

Beliau berkata monopoli, terutamanya bagi laluan domestik, tidak baik untuk pengguna atau negara.

Mueller berkata persaingan bukanlah sesuatu yang mengancam dan adalah baik untuk pasaran.

"Tanpa persaingan setiap syarikat penerbangan akan menjadi leka dan santai," katanya.

Pada masa yang sama, Mueller berkata syarikat penerbangan tidak boleh menawarkan tambang di bawah kos yang ditanggung mereka.

"Anda mempunyai fenomena ini di sektor (laluan) Malaysia-Australia," katanya, sambil menambah dalam jangka masa panjang, amalan seperti ini boleh memusnahkan pasaran kerana pelanggan sudah terbiasa dengan tambang yang tidak realistik.

**Hakcipta Terpelihara © 2015 Star Publications (M) Bhd (Co No 10894-D)**

Source: <http://www.mstar.com.my/berita/berita-semasa/2015/06/11/tolak-penyatuan-mas-airasia/>